

## Pantau peniaga tidak pameran tanda harga

NORAFIDAH ASSAN | 22 Mei 2020



Vijayakumaran (kanan) meninjau sekitar pasar Rasah pagi tadi.

**SEREMBAN** - Persatuan Pelindung Pengguna Negeri Sembilan menggesa Kementerian Perdagangan Dalam Negeri dan Hal Ehwal Pengguna (KPDNHEP) membuat pemantauan di Pasar Rasah susulan terdapat dakwaan peniaga tidak mempamerkan tanda harga.

Pengerusinya, A Vijayakumaran berkata, pihaknya menerima aduan daripada penduduk setempat dan keadaan menyukarkan pengguna untuk mengetahui maklumat berkenaan harga sewaktu membuat urusan pembelian termasuk beberapa barangan kawalan.

Menurutnya, ada yang mendakwa berlaku kenaikan harga barangan termasuk ayam yang mencecah sehingga RM9 sekilogram minggu lalu.

"Bagaimanapun, ketika tinjauan di sini pagi ini, harga ayam diselaraskan mengikut harga siling ayam standard RM7.50 sekilogram," katanya ketika membuat tinjauan di lokasi hari ini.



**Vijayakumaran (kiri) meninjau sekitar pasar Rasah pagi tadi.**

Sehubungan itu, Vijayakumaran berharap pihak berkuasa dapat menjalankan pemantauan secara berkala sekali gus mengelakkan pengguna tertipu.

Beliau berkata, sekiranya keadaan itu berlaku, ia sudah tentu membebankan pengguna apatah lagi kebanyakannya daripada golongan B40.

"Mereka melahirkan rasa tidak puas hati akan situasi seperti ini terutamanya pada musim perayaan," katanya.

Sementara itu, seorang penduduk Rasah, L Saravanan, 67, melahirkan perasaan kecewa apabila peniaga gagal mempamerkan tanda harga sepertimana diarahkan pihak bertanggungjawab.

"Sebagai pembeli, sukar untuk kami membuat pilihan, selain itu kebersihan pasar ini juga perlu diberi perhatian oleh pihak berkenaan bagi mengelak masalah lain pada masa hadapan," katanya.

<https://www.sinarharian.com.my/article/84696/EDISI/Melaka-NS/Pantau-peniaga-tidak-pamer-tanda-harga>